

魏

書

四二

前上十志啓

臣收等啓昔子長命世偉才孟堅冠時特秀盡
章前誥裁勒墳史紀傳之間申以書志緒言餘
述可得而聞叔峻刪緝後劉紹統削撰季漢十
志實範遷固表蓋闕焉曹氏一代之籍了無具
體典午終世之筆罕云周洽假復事播四夷盜
聽間有小道俗言要竒好異考之雅舊咸乖實
錄自永嘉喪圮中原清然偏僞小書殆無可取
魏有天下跨蹤前載順未克讓善始令終陛下

極聖窮神奉天屈己顧眄百王指掌万世深存
有魏撫運之業永念神州人倫之緒臣等肅奉
明詔刊著魏籍編紀次傳備聞天旨竊謂志之
爲用網羅遺逸載紀不可附傳非宜理切必在
甄明事重尤應標著搜獵上下摠括代終置之
衆篇之後一統天人之迹褊心末識輒在於此是
以晚始撰錄彌歷炎涼採舊增新今乃斷筆
時移世易理不刻船登閣含毫論叙殊致河溝
往時之切釋老當今之重藝文前志可尋官氏

魏代之急去彼取此敢率愚心謹成十志二十
卷請續於傳末并前例目合二百三十一卷臣
等妨官秉筆迄無可採塵黷旒冕憤深冰谷
謹啓

十月持節都督梁州諸軍事驃騎將軍梁州
刺史前著作郎富平縣開國子臣魏收啓
平南將軍司空司馬修史臣辛元植

冠軍將軍國子博士修史臣刀柔

陵江將軍尚書左主客郎中修史臣高孝幹

前西河太守修史臣綦母懷文

天象志一第一

魏書一百五

夫在天成象聖人是觀日月五星象之著者變
常舛度徵咎隨焉然則明晦暉蝕疾餘犯守飛
流歟起彗孛不恒或皇靈降臨示譴以戒下或
王化有虧感達於天路易稱天垂象見吉凶觀
乎天文以察時變書曰曆象日月星辰敬授民
時是故有國有家者之所祗畏也百王興廢之
驗萬國禍福之未兆勤雖微罔不必至著於前

載不可得而備舉也班史以日暈五星之屬列
天文志薄蝕彗孛之比入五行說七曜一而
分爲二志故陸機云學者所疑也今以在天諸
異咸入天象其應徵符合隨而條載無所顯驗
則闕之云

太祖天興五年八月天鳴

六年九月天鳴

皇始二年十月壬辰日暈有佩璫占曰兵起天
興元年九月烏丸張超收合亡命聚黨三千餘

家據渤海之南皮自號征東大將軍烏丸王鈔
掠諸郡詔將軍庾岳討之

天興三年六月庚辰朔日有蝕之占曰外國侵
土地分五年五月姚興遣其弟義陽公平率衆
四萬來侵平陽乾壁爲平所陷

六年四月癸巳朔日有蝕之占曰兵稍出十月
太祖詔將軍伊謂率騎二万北襲高車大破之
天賜五年七月戊戌朔日有蝕之占曰后死六
年七月夫人劉氏薨後諡爲宣穆皇后

太宗神瑞二年八月庚辰晦日有蝕之

世祖始光四年六月癸卯朔日有蝕之占曰諸侯非其人神麅元年二月司空奚斤監軍侍御史安頡討赫連昌擒之於安定其餘衆立昌弟定爲主走還平涼斤追之爲定所擒將軍丘堆棄甲與守將高涼王禮東走蒲坂世祖怒斬堆神麅元年十一月乙未朔日有蝕之

太延元年正月己未朔日有蝕之

四年十一月丁卯朔日有蝕之

太平真君元年四月戊午朔日有蝕之

三年八月甲戌晦日有蝕之

六年六月戊子朔日有蝕之占曰有九族夷滅
七年正月戊辰世祖車駕次東雍州庚午圍薛
永宗營壘永宗出戰大敗六軍乘之永宗衆潰
斬永宗男女無少長皆赴汾水而死

七年六月癸未朔日有蝕之占曰不臣欲殺八
年三月河西王沮渠牧犍謀反伏誅

十年夏四月丙申朔日有蝕之

六月庚寅朔日有蝕之占曰將相誅十一年六

月己亥誅司徒崔浩

十一年十二月辛未日南北有珥

高宗興安元年十一月己卯日出赤如血

二年三月日暉

興光元年七月丙申朔日有蝕之

和平元年九月庚申朔日有蝕之

三年二月壬子朔日有蝕之占曰有白衣之會

六年五月癸卯高宗崩

顯祖皇興元年十月己卯朔日有蝕之

二年四月丙子朔日有蝕之占曰將誅四年十

月誅濟南王慕容白曜

十月癸酉朔日有蝕之占曰尊后有憂三年夫
人李氏薨後謚思皇后

三年十月丁酉朔日有蝕之

高祖延興元年十二月癸卯日有蝕之占曰有
兵二年正月乙卯統萬鎮胡民相率北叛遣寧

南將軍交趾公韓拔等滅之

三年十二月癸卯朔日有蝕之

四年正月癸酉朔日有蝕之占曰有崩主天下
改服有大臣死五年十二月己丑征北大將軍
城陽王壽薨六年六月辛未顯祖崩

七月丙寅日有背珥

五年正月丁酉白虹貫日直珥一

承明元年三月辛卯日暉五重有二珥

太和元年冬十月辛亥朔日有蝕之

二年正月辛亥日暉東西有珥

二月乙酉晦日有蝕之占曰有欲反者近三月
遠三年四年正月癸卯洮陽羌叛枹罕鎮將討
平之

九月乙巳朔日有蝕之占曰東邦發兵四年十
月丁未蘭陵民桓富殺其縣令與昌慮桓和北
連太山羣盜張和顏等聚黨保五固推司馬朗
之爲主詔淮陽王尉元等討之

三年春正月癸丑日暉東西有珥有佩戟一重
北有偃戟四重後有白氣貫日珥狀如車輪京

師不見雍州以聞

三月癸卯朔日有蝕之占曰大臣誅四月雍州
刺史宜都王目辰有罪賜死

四年正月辛酉日東西有珥北有佩日暉貫兩
珥

五年正月庚辰日暉東西有珥南北並白氣長
一丈廣二尺許北有連環暉又貫珥內復有直
氣長三丈許內黃中青外白暉乍成散乃滅
七月庚申朔日有蝕之

七年十二月乙巳朔日有蝕之

八年正月戊寅有白氣貫日占曰近臣亂十年
三月丁亥中散梁衆保等謀反伏誅

十一年十一月丁亥日失色

十二年三月戊戌白虹貫日

十三年二月乙亥朔日十五分蝕八占曰有白衣之會十一月己未安豐王猛薨

十四年二月己巳朔未時雲氣班駭日十五分

蝕一占有白衣之會九月癸丑文明太皇太

后馮氏崩

十五年正月癸亥晦日有蝕之占曰王者將兵
天下擾動十七年六月丙戌高祖南伐

十七年六月庚辰朔日有蝕之

十八年五月甲戌朔日有蝕之

二十年九月庚寅晦日有蝕之

二十三年六月己卯日中有黑氣占曰內有逆
謀八月癸亥南徐州刺史沈陵南叛

十二月甲申日中有黑氣大如桃

世宗景明元年正月辛丑朔日有蝕之

七月己亥朔日有蝕之

二年四月癸酉日自午及未再暉內黃外白

七月癸巳朔日有蝕之

八月戊辰日赤無光中有黑子一

三年正月乙巳日中有黑氣如鵝子申酉復見

又有二黑氣橫貫日

二月辛卯日中有黑氣大如鵝子

七月丁巳朔日有蝕之